

Книгаен тодматскон

Историын бугыръяськыны өтись роман



Йоскалык библиотекаын «Контакте» бамысыз

Йоскалык библиотекаын ортчиз Ульфат Бадретдиновлэн Максим Прокопьев югдытсь сярысь «Туннэ — чуказелэн кутсконэз» романэныз (12+) тодматскон.

Жыт кутскиз кырзан бордысен. Ульфат Бадретдиновлэн кылбурьёсызъя гожтэм кырзаньёссэ быдэстиз Удмуртиысь калык артист Геннадий Бекманов. Ужрадэз нуись тодосчи, литературовед Виктор Шибанов, вераськонэз усьтыса, шуиз:

— У. Бадретдиновлэн романаз вашкала осконьёс но туалалык мыно артэ, жанрезъя со луэ магической реализм. Таё амалэн гожтэм романьёс 1-2 гинэ, со Вячеслав Ар-Сергилэн «Бубылиос» но Олег Четкарёвлэн «Пиртэш толэзь». Но «Туннэ — чуказелэн кутсконэз» произведенийын вакытьёс

сурасько. Удмурт прозаын таёеэз ой вал на.

Кун Кенешлэн Төрөезлэн воштитсез Татьяна Ишматова огкутскемен лыдзем выль романэз.

— Максим Прокопьев романын — улэп адыми, со яратыны, эшъяськыны, калыкез жутыны быгатэ. Та книгаез лыдзыкүм, киноез учкем кад йөтгиз. Мыным потэ, мар гожтэмын романлэн пумаз, асьмеос, удмуртьёс, улонэ пычатыны быгатомы. Асьмелы умоез сярысь малпаськыны быгатыны кулэ, — шуиз Татьяна Ишматова.

Ульфат Бадретдинов вераз, кызы романэз бордын ужаз. Тодаз вайиз материал утчамзэ, калыкен пумиськылэмьёссэ. Филология наукаосъя кандидат Александр Шкляев верамъя, Максим Прокопьев сярысь сюжетёс удмурт литератураын өз ышылэ, но нокин та темаез йылаз-пумаз вуттыны

өз быгаты вал. Кылсярысь, огпол Аркадий Клабуков писательлэсь юазы, мар бордын со ужа шуыса. Прозаик шуиз: мон гожъясько М. Прокопьев сярысь повесть. Но со өз поты. Öz тырме документьёс, архивьёс, тодэ ваёнъёс.

— Максим Прокопьев вазь быриз, соин ик со сярысь материалёс ожит. Ульфат Бадретдиновлэн романэз документально-исторической гинэ өвёл, со философской, уго автор пöртэм вакытьёсты, адымиосты герза. Та роман У. Бадретдиновлэн подвигез, — шуиз Александр Григорьевич.

У. Бадретдиновен одиг гуртын вордскем кылбурчи Люза Бадретдинова верамъя, та роман өте лыдзисьёсты историын бугыръяськыны.

Галина СЕМЁНОВА

Писатель Ульфат Бадретдинов вера, кызы кылдиз «Туннэ — чуказелэн кутсконэз» романэз.

Сям-йылольёс

Нянез мөля борды пачкатыса шорман вакытьёсы

Милям гуртамы арлэн пумаз, пудоосты, тылобурдоосты вандылэм бере, юондырьёс ортчылзы.

Шуркынмон, толсур толэзьёсы гуртоос озы кунояськыса ветло вал. Таяз шутэтскон нуналэ одигез куное өте, собереяз — мукетыз. Трос калык люкаськылз: чыжывыжыос, кум-кумаос, бускельёс. Отчаскысьёс нылпиос вал, «мынэ ай соос дороз ветлэ» шуыса милемды ысьяллызы. Шуом, Койкиос дороз яке Кушманьёс вадьсозь. Ми, вить-куать аресъемьёс, тодиськом вал ини кушем нимьёсты. Шумпотыса коркась корка пыраллямы. Зеч иворен пырем понна маке но ческытан сётъяллызы. Гуртэ вуыса, ивортылым: соосыз лыктозы, таиз уз быгаты — йыркуръяськыны өз лэззы.

Куноос лыктытозь, ми, пинальёс, полате тубылым. Отысен, йырёмес мычыса, чакласа улймы. Крезен, арганэн лыктисьёсыз ульчаысен ик задор мылкыдын кырзаса пырылызы. Кышноос чебер дэремьёссэс дйяса, пöртэм пужыятэм носкиоссэс кутчаса вуылызы. Мон синмаськылй туго кышетъёссылы. Син котырзэс яке ымдурзэс буямен адзылэме өвёл. Чыжыт бамъёсын гинэ кезыт азысь пырылызы. Анае соосты пöсятэмен утялтылыз.

Жок вылын мар но өз сылы! Ваньзэ пöзтылызы, пыжылызы бадзым гурын. Вань дасям сиён-юонэз, жок выль тэрымтэеныз, тэркыосы



Пётр Ёлкинлэн «Анайэн жок вылыз» суредэз.

вылысьтыз вылаз пуктыло вал. Кузё озы возьматыны тыршиз, дуно куноосты та юртын витё шуыса. Бадзым юдэсэн пöзтэм сйль, пыжем тылобурдо, студень, калягалэсь паронка, шу кисаль, вышкыын сылалтэм кубиста, огреч, нингуби. Азвыл та губи трос луэ вылэм. Ми, нылъёс, эшъясьынымы люкаськыса, шурын соосты миськылымсузьяллымы. Туала аре сямен салатъёсты, винегретэз сяна, адзылэме ой вал.

Тодам лыктэ на: жок выльзэ чеберьяллыз куалекъяса сыйсь — студень выллем — дасям ческыт сиён. Туала кылын вераса — желе. Нимзэ но со сиёнлэсь уг тодиськы ни, но со льоль тусо но туж ческыт маке вал. Анае мактаськыса утялтылыз: «Ваньзэ эскере, куноосы. Петыре пöйшураз:

таиз — койык сйль, таиз — лудчöж».

Тужгес но трос лубылызы пöртэм выльёсын, пушкесэн пöрамъёс: шаньги, шунянь... Анаймылы ми но, нылпиос, пöраськыны юрттылым: кин картошка туге, кин кубиста кора.

Пересьёс чемысь ушъяллызы няньлэсь зöкталаз: та, пе, лобыр-лобыр чебер жутскемын ук. Вашкала дырьёсы удмуртьёслэн ваньмызлэсь дуно сиёнзы нянь вылэм. Озы пересьёсмы милемлы но сое пычатыса кельтйзы. Мынам чакламея, туала аре сямен, нянь сукыриез, жок выль поныса, өз вандылэ. Мөля бордазы пачкатыса, нянез шормало вал. Нош пельнянлэсь огпал пумзэ чепылытэк кутылызы, лымо мед луоз шуыса. Пумьёссэ ваче карем

пельнянез ми малы ке зуч пельнянь шуылым.

Жöклэн огпал пумыз утялтиськисьлэн вал. Отын 5-6 графиньёсын пöртэм юонъёс сыйзы. Вань пöртэмзэ ик, стопкаосы тырыса, утялтиськись поднос выль пуктылэ но, куноос, стопкаосты шöмъяса, ог-огзылы сётъяло. Нырысетйез верьясь — утялтысь.

Сием-юэмзы бöрсый жок сьöрын одигез куно кыче ке кырзан мытэ но, мукетъёсыз бордаз итйсько вал. Жок сьöрысь потыса, зус выль пуксыса, зыбыль-зыбыль кенешылызы. Вераськон висказы кырзаса но лэзё вал. Анае кырзаса-вераса, стопкаоссэс тырмытъяса, вöзтйзы ортчылз. Мыным нёжтыса лэзем кырзаньёссы мöзмьтэсь потылызы. Нош

арган шудэм улсын эктисьёслы синмаськылй. Пиосъёс, пал кизэс кус вылазы поныса, тыпырто вал. Кышномуртьёслэсь пыдзэс лёгыса эктэмзэс уг тодиськы. Капчиен гинэ, вакчи вামышгёсын эктылызы, ву вылтй сямен кошко кадэ потылыз.

Анаелэсь верамзэ тодам вайиско на. Выжыын крезьчи (арганэн шудись) өвёл ке, сое палэнысь өтё вал. Ма, кыче шулдырьясськон со крезьгуртэк? Пукись адыми азе лыктыса, йырзэс мыкырьяса эктэмзы тумошо потэ вал. Соос ог-огзэс озы эктыны өтё шуыса, бöрысь ини валатски. Паймылй на таизлы но: ымдуразы стопкаоссэс йöтто, пöсятэмез верьям каро, нош юонзы уг öжыта. Анайлэсь, песанайлэсь сектаськыкузы кылылй «кöня ке зымырты, чепыллыса гинэ пукиськод» шуылэмзэс.

Кузёослы зеч утялтэмзы понна тау карыса, куноос озы ик кырзаса кошкылызы. Нокинлэсь кудзыса, шонаськыса ветлэмзэ адземе ой вал. Куно бервылэз утялтыкузы, кузёос мылес стопкаосты я косяк азысь, я зус улысь шедьтылызы. Таиз, пе, шöмъямын но өвёл шуыса зукыртылызы.

Кыдөкысь гуртьёсысь бöлякёсын та выллем юондырьёс, оло, утиськемын на. Милям югдур воштйськемын ни, вашкала дыръя сямен, огозы доры куное уг ни ветло.

Валентина МИНЕЕВА.
Дэри ёросысь Якшур гурт